

A ESTRADA**EDITO***Información pública*

Segundo artigo 30.2.a do Regulamento de Actividades Molestas, Insalubres, Nocivas e Perigosas de 30 de novembro de 1961.

Prazo: 10 días hábiles.

Actividade: Legalización de nave para vacún de cría en San Xiao de Veá, interesada por dona Carmen Codesido Suárez.

Obxecto: Proxecto visado con data 26 de abril de 2000, redactado polo Enxeñeiro Técnico Agrícola, don Alberto Rodríguez Ameijeiras.

A Estrada, 3 de maio de 2000.—O Alcalde, ilexible. 4406

A N U N C I O

Polo Pleno deste Concello en sesión ordinaria celebrada o día 12 de maio de 2000, acordouse a aprobación inicial do Regulamento de Protección de Medio Ambiente, Limpeza Pública e Recollida de Lixo no Concello da Estrada, o que conforme ó establecido polo art. 49 da Lei 7/85 de 2 de abril faise público para información e audiencia das persoas interesadas por un prazo de trinta días.

Durante o indicado prazo poderá examinarse na Secretaría Xeral e presentar reclamación e suxerencias.

Faise constar que se non se presentaran reclamacións ou suxerencias a aprobación inicial converterase en definitiva.

A Estrada, 26 de maio de 2000.—O Alcalde, ilexible. 4412

EDITO*Información pública*

Segundo artigo 30.2.a do Regulamento de Actividades Molestas, Insalubres, Nocivas e Perigosas de 30 de novembro de 1961.

Prazo: 10 días hábiles.

Actividade: Estación de servizo e centro de distribución de combustibles en Polígono Industrial de Toedo, interesada por Carburantes Acibro S.L.

Obxecto: Proxecto visado con data 30 de marzo de 2000 redactado polo Enxeñeiro Técnico de Obras Públicas don Juan Merino Sánchez e o Enxeñeiro Industrial don Eladio Bóveda González.

A Estrada, 3 de maio de 2000.—O Alcalde, ilexible. 4410

GONDOMAR**EDITO**

Habéndose solicitado desta Alcaldía por don Manuel González Alonso, en representación de "Combustibles del Noroeste", licencia municipal para instalación dun sistema de Recuperación de Vapores a emplazar en Vincios-Pasaxe, cumprindo o disposto polo apartado a), do número 2, do art. 30 do Regulamento de Actividades Molestas, Insalubres, Nocivas e Perigosas de 30 de novembro de 1961, sométese a información pública por período de dez días hábiles, a fin de que durante o mesmo —que empezará a contarse dende o día seguinte ó da inserción do presente edito no Boletín Oficial da provincia—, poida examinarse o expediente, na Secretaría deste Concello, polas persoas que de algún modo considérense afectadas pola actividade que se pretende instalar e formular por escrito as reclamacións ou observacións que se estimen oportunas.

Gondomar, a 4 de maio de 2000.—O Alcalde acctal., ilexible. 4408

EDITO

Habéndose solicitado desta Alcaldía por don Manuel Nández Figueroa, licencia municipal para a apertura dun bar, a emplazar en Mañufe-Cristillón, e dando cumprimento ó preceptuado no artigo 36, apartado a) do Regulamento Xeral de Policía de Espectáculos Públicos e Actividades Recreativas de 27 de agosto de 1982, sométese a información pública por período de dez días hábiles, a fin de que durante o mesmo —que empezará a contarse dende o día seguinte ó da inserción do presente edito no Boletín Oficial da provincia—, poida examinarse o expediente, na Secretaría deste Concello, polas persoas que de algún modo considérense afectadas pola actividade que se pretende instalar e formular por escrito as reclamacións ou observacións que se estimen oportunas.

Gondomar, a 3 de maio de 2000.—O Alcalde acctal., ilexible. 4407

* * *

PONTECESURES**EDICTO**

Habiéndose solicitado de esta Alcaldía por don Edmundo Lamelas Abella, licencia municipal para a apertura de café-bar a emplazar en calle Castelao nº 5 port. 3, cumprindo lo dispuesto por el apartado a), del número 2, del art. 30 del Reglamento de Actividades Molestas, Insalubres, Nocivas y Peligrosas de 30 de noviembre de 1961, se somete a información



*Excmo. Concello
da Estrada
(Pontevedra)*

REGULAMENTO DE PROTECCIÓN DO MEDIO AMBIENTE, DE LIMPEZA PÚBLICA E DE RECOLLIDA DE LIXO DO CONCELLO DA ESTRADA

EXPOSICIÓN DE MOTIVOS

NOTA PREVIA

Sobre a base dos artigos 45 e 149.1.23 da Constitución Española de 1978, e artigos 27.30 e 29.4 da Lei Orgánica 1/81 do 6 de abril, pola que se aprobou o Estatuto de Autonomía de Galicia, esta Comunidade Autónoma ostenta con carácter exclusivo a competencia para aproba-las normas adicionais sobre protección do medio ambiente e paisaxe. Froito deste, aprobouse a lei 1/95 do 2 de xaneiro, de Protección Ambiental de Galicia, de obrigado cumprimento para toda persoa física ou xurídica, pública ou privada, que puidese producir deterioro no medio ambiente.

En cumprimento do art 29.2 e da Disposición Adicional 3ª da nomeada lei galega, redáctase o presente Regulamento Municipal, co obxecto de satisfacer a crecente preocupación da poboación estradense sobre a materia, e en consecuencia, participar dende a esfera administrativa na educación ambiental e na concienciación ecolóxica, para a transmisión a xeracións vindeiras deste valor sempre presente e agora en alza.

Para a redacción deste regulamento, tívose en conta, ademais da normativa citada, a lei 10/97 do 22 de agosto, de Residuos Sólidos Urbanos de Galicia; Lei 1/95 do 2 de xaneiro, de Protección Ambiental de Galicia; Decreto 154/98 do 28 de maio, polo que se aprobou o Catálogo de Residuos de Galicia; Decreto 442/90 do 13 de setembro, de Avaliación do Impacto Ambiental para Galicia; Decreto 327/91, do 20 de outubro de Avaliación de Efectos Ambientais de Galicia; Lei 10/98 do 21 de abril, de Residuos do Estado; Lei 11/97, do 24 de abril, de Envases e Residuos do Estado; e concordantes.

CAPÍTULO I Disposicións xerais

Artigo Preliminar.-

I.- Ámbito de Aplicación: Serán de aplicación as prescricións do presente regulamento en todo o Termo Municipal da Estrada, podendo entenderse este ámbito por acordo expreso entre os entes locais que constitúan mancomunidades cò obxecto de aplica-lo contido do presente Regulamento.

II.- Exercicio de competencias municipais: Poderán ser exercidas polo Alcalde, Concelleiro Delegado, ou calquera outro Órgano Municipal que se creara "ad hoc", que

podería esixir de oficio ou a instancia interesada, a adopción das medidas preventivas, correctoras, reparadoras, inspectoras ou sancionadoras necesarias.

Artigo 1.- Obxecto

Este regulamento ten por obxecto a regulación:

- a) das actividades relativas á limpeza de vías e espazos públicos;
- b) da recollida de refugallos e lixos sólidos urbanos, do seu transporte ó vertedoiro público e, de se-lo caso, do seu tratamento;
- c) do mantemento e conservación de terreos, edificacións e instalacións de titularidade pública ou privada en boas condicións estéticas, de salubridade e de seguridade; e
- d) de medidas de protección do medio ambiente natural e urbano.

Artigo 2.- Definición

Teñen a condición de refugallos ou lixos sólidos urbanos calquera substancia ou obxecto do que o seu posuídor se desprenda ou do que teña a intención ou a obriga de desprenderse.

Clasificación de residuos:

- a) Residuos domiciliarios: os que proceden da normal actividade doméstica ou de establecementos públicos asimilables ós anteriores polo seu volume e natureza. Entre eles, os restos de poda e xardinería, os desfeitos da alimentación, consumo doméstico, e varrido de rúas e vivendas, envoltorios, envases e embalases rexeitados polos cidadáns ou establecementos públicos, restos de consumo de bares, restaurantes e similares, restos de consumo de supermercados, autoservicios e análogos, escouras, cinzas, cabichas, etc.
- b) Residuos industriais: Envoltorios, envases, embalases e residuos propios destas actividades, ademais das actividades comerciais e de servicios, que polo seu volume, peso, humidade ou cantidade non sexan clasificables como residuos domiciliarios.
- c) Residuos sanitarios: Os producidos en centros hospitalarios, clínicos, sanitarios ou asimilables, que por razón da súa orixe ou natureza

suporían risco para a saúde humana ou o medio ambiente, entre eles, os residuos biolóxicos das salas de cura ou quirófanos, os patolóxicos e/ou infecciosos (restos de cultivos, obxectos punzantes, etc), ou similares.

- d) Residuos especiais: Entre outros, alimentos ou produtos caducados, mobles e vellos enseres, vehículos abandonados, ou as súas pezas, animais mortos, terras e entullos procedentes de obras civís e construcións (areas e similares empregados na construción, escavacións ou derrubes, etc) ou outros de semellante entidade.
- e) Outros residuos: Os que pola súa natureza ou presentación e determinen polos servicios técnicos municipais, os que, con independencia de que figuren ou non nesta clasificación, interpretarán as dúbidas sobre produtos ou circunstancias que non estean claramente definidas.

Artigo 3.- Limpeza de vías e espacios públicos

A limpeza da rede viaria e dos espacios públicos e a recollida do lixo que se orixine neles realizaraas o concello directamente ou, se procede, a través das empresas xestoras deseñ servicios públicos, e por entidades supramunicipais.

Artigo 4.- Limpeza de inmuebles e espacios privados.

1. A limpeza das rúas, espacios e terreos de dominio particular corresponderalles ós seus donos.
2. Os titulares e os ocupantes dos inmuebles urbanos deberán manter sempre limpos os patios de luces, os de cuarteiróns e as outras áreas comúns.

Artigo 5.- Prohibicións

1. Está totalmente prohibido:
 - a) botar ó chan das vías e dos espacios públicos calquera clase de lixo;
 - b) botar ás beirarrúas e calzadas calquera clase de refugallo ou líquido procedente da limpeza de locais e vivendas;

c) botar nas papeleiras ou en calquera outro tipo de recipiente dedicado á recollida de lixo, líquidos ou lixos sólidos que pola súa natureza e dimensións sexan inadecuados para aqueles recipientes;

d) pór en colectores destinados á recollida selectiva materiais ou lixos distintos dos previstos;

e) fedellar nos colectores e papeleiras ou manipulalos, ou realizar calquera acto que supoña o seu estrago ou deterioración.

f) Poñe-lo lixo fora dos contedores máis de media hora antes da súa recollida.

2. Sen prexuízo das penas ou sancións que procedan, os que causen danos nas papeleiras e colectores públicos de residuos sólidos urbanos, deberán indemnizarllos ó concello. A indemnización será determinada e esixida por vía administrativa, previa valoración contradictoria dos servizos técnicos municipais.

Artigo 6.- Prohibicións

Tamén está prohibido realiza-las seguintes actividades:

a) Lavar, limpar e amañar automóbiles, e cambiárlle-lo aceite e outros líquidos nas vías e espazos públicos.

b) Sacudir alfombras, esteiras ou calquera outro elemento na vía pública ou desde unha fiestra, balcón ou terraza que dea sobre ela.

c) Pór tendedeiras ou tendais de roupa nos ocios das fachadas exteriores dos inmobles que sexan visibles desde a vía pública.

d) Pór tarros de plantas ou outros elementos nos ocios dos edificios con risco de caída sobre a vía pública.

e) Cambios de aceites a automóbiles en garaxes, que comporten vertido do aceite usado á Rede de Saneamento Municipal.

Artigo 7.- Limitacións da publicidade na vía pública e nos equipamentos públicos:

1. Non está permitido realizar actos de propaganda ou publicidade que comporten o lanzamento de carteis, follas ou calquera outro elemento impreso nas vías e espazos públicos.

2. Tampouco está permitido realizar actos de propaganda ou publicidade que comporten pegar, prender ou pendurar carteis, facer pintadas e pór folletos nas fachadas dos edificios públicos ou no mobiliario e no equipamento urbanos (por exemplo, en farolas, bancos e marquesiñas). Tamén se prohíbe a colocación de folletos nos parabrisas dos automóviles estacionados na vía pública.

3. Serán responsables da infracción das normas contidas nos dous apartados anteriores os que promovan ou xestionen aqueles actos, e, na falta deles, as persoas ou entidades físicas ou xurídicas a prol das que se faga a publicidade.

4. Poden quedar exentos das disposicións contidas nos apartados 1 e 2 anteriores, previa autorización do Concello:

a) os actos que constitúan propaganda electoral nos períodos e nos lugares sinalados conforme á lei;

b) aquelas actividades que polo seu especial relevo político ou polo interese público e xeral implicado requiran a realización daquelas formas de publicidade.

Artigo 8.- Obrigas dos titulares de establecementos

1. Os establecementos permanentes ou de tempada, os ocasionais e os desmontables situados en vías ou espazos públicos están obrigados a manter sempre limpo o lugar no que desenvolvan as súas actividades e mailo seu contorno.

2. Esa obriga tamén lles incumbe ós titulares de cafés, bares e outros establecementos públicos suxeitos a licencia ou autorización municipal, en canto á superficie da vía ou espazo público que ocupen con mesas, cadeiras e outros elementos, así como en canto á beirarrúa correspondente á lonxitude da súa fachada.

3. Os titulares de establecementos nos que se desenvolvan actividades que polas súas características orixinen papeis, impresos, plásticos, envolturas ou refugallos semellantes (como librerías, quioscos, tendas de alimentación, farmacias, etc.) porán papeleiras ou recipientes para o lixo nun lugar destacado dos seus locais coa finalidade de que os usuarios destes non os boten á vía pública.

Artigo 9.- Carga e descarga de automóviles

1. Cando se fagan operacións de carga e descarga de calquera automóbil que estea situado nunha vía ou espazo público, os interesados deberán limpa-las beirarrúas e calzadas que lixen como consecuencia deses traballos.

2. Están obrigados ó cumprimento do que dispón o apartado anterior os donos dos automóviles; as persoas que fagan os traballos de transporte, carga e descarga; e, subsidiariamente, os titulares dos establecementos ou inmobles implicados nas operacións sinaladas.

Artigo 10.- Circulación de automóviles

1. Os titulares e conductores de automóviles que leven calquera clase de materiais que pola súa natureza poidan verterse, caer ou espallarse sobre a vía pública están obrigados a toma-las medidas necesarias para evitalo e, se é o caso, a recolle-los materiais que se desprendan e a limpa-la área afectada.

2. Cando os automóviles de transporte saian de lugares en obras e vaian circular por vías urbanas, deberán limpa-las rodas e baixos para que non lixen as rúas.

Artigo 11.- Obrigas dos posuidores de animais.

As persoas que leven cans ou outros animais polas vías e espacios públicos, á parte de mantelos atados e de cumprir coa normativa sectorial vixente, deben impedir que lixen os xardíns e lugares destinados ó tránsito; de se da-lo caso, deben recoller de xeito inmediato os restos que deixen.

CAPÍTULO II

Limpeza de terreos e edificios

Artigo 12.- Obrigas dos donos de terreos e inmobles particulares

1. Os donos de toda clase de terreos, urbanizacións de iniciativa particular, edificacións e instalacións deberán mantelos sempre limpos e en boas condicións estéticas, de salubridade e de seguridade, tal e como se establece na Ordenanza Especial de Limpeza e valado de solares, aprobado polo Concello Pleno o 13 de febreiro de 1998.

2. O concello poderá ordenar, de oficio ou por solicitude de calquera persoa interesada, a execución das obras ou traballos necesarios para repor ou conservar aquelas condicións previa valoración contradictoria dos servizos técnicos municipais, co sinalamento do prazo de realización e coa advertencia de execución subsidiaria polo propio concello e a cargo do obrigado.

3. O incumprimento do deber regulado neste artigo suporá a iniciación do correspondente expediente sancionador, coa imposición da multa que corresponda segundo a lexislación aplicable.

Artigo 13.- Limpeza de elementos lindeiros coa vía pública

Cando se realice a limpeza de escaparates, portas, marquesiñas, toldos ou calquera outro elemento dun inmovible lindeiro coa rúa, deberanse adoptar as precaucións necesarias para non molesta-los usuarios da vía pública nin lixar esta.

CAPÍTULO III **Recollida de lixo**

Artigo 14.- Servicio de titularidade municipal

1. O Concello da Estrada, directamente ou no seu caso, a través da empresa xestora do servizo ou entidades supramunicipais nas que estivese incorporado, realizará a recollida e o transporte de lixos sólidos domiciliarios e semellantes cos itinerarios, frecuencia e horarios que se determinen, ós que se lles dará publicidade para o seu coñecemento polos veciños, especialmente cando se produzan modificacións.

2. Ningunha persoa física ou xurídica se poderá dedicar á recollida, transporte e aproveitamento de lixos sólidos sen a concesión ou autorización previa do concello.

Artigo 15.- Disposición do lixo para a súa recollida

1. Os produtores e posuidores de lixos sólidos urbanos deberán dispoñer para a súa recollida no tipo de recipiente normalizado que en cada caso sinale o concello en atención á natureza dos refugallos, ás características do sector ou vía pública e á planificación do servizo.

2. O concello adquirirá a propiedade do lixo desde a súa entrega e recollida, calquera que sexa a forma da prestación do servizo.

3. Nas áreas, lugares ou barrios onde a recollida se faga mediante colectores de titularidade municipal, os usuarios están obrigados a usalos con coidado e a mantelos en adecuadas condicións de hixiene, e son responsables da deterioración que lles causen pola súa culpa ou negligencia. Todo iso sen prexuízo da limpeza e desinfección

periódica deles, que realizarán os servicios municipais, ou a empresa xestora do servicio.

4. Os usuarios deberán dispor sempre do lixo mediante bolsas perfectamente pechadas e sen líquidos, mesmo cando utilicen os colectores.

Artigo 16.- Obriga de adquisición e uso de colector normalizado

O concello, por medio dunha norma regulamentaria ou de resolución da alcaldía, poderá obrigar ós establecementos comerciais ou industriais e ás comunidades de propietarios que reúnan determinadas características a adquiriren e a utilizaren colectores normalizados para o depósito do seu lixo.

Artigo 17.- Danos e perdas derivados do lixo

Os produtores e posuidores de lixos sólidos urbanos quedarán exentos de responsabilidade polos danos e perdas que se poidan derivar deles, sempre que cumpran as normas reguladoras do seu depósito e entrega.

Artigo 18.- Lixos tóxicos e perigosos

Cando os lixos sólidos urbanos presenten características que os fagan tóxicos ou perigosos, esixiráselle ó produtor deles que lles dea o tratamento que ordena a normativa especial aplicable a esa clase de refugallos.

Artigo 19.- Depósito e recollida selectiva do lixo

1. O concello poderá dispor que en todo o territorio municipal, ou en parte del, se depositen por separado en recipientes especiais os lixos susceptibles de distintos tratamentos ou aproveitamentos, como cartóns, latas, vidro, metais, plásticos e outros (recollida selectiva do lixo).

2. O concello programará campañas de concienciación cidadá coa finalidade de responsabiliza-los veciños sobre o impacto ecolóxico do consumo, produción e tratamento de lixos.

Artigo 20.- Horario e condicións de depósito de lixo

1. A colocación de recipientes na vía pública ou o depósito nos colectores non se poderá facer antes dunha hora do paso do automóbil de recollida nin fóra do horario sinalado en cada caso por resolución da alcaldía.

2. Os colectores de lixo particulares deberanse pór onda o edificio ou local que os use co obxecto de evitarlles prexuízos e molestias ós outros veciños.

3. Nos lugares e rúas ós que non poidan accede-los automóviles de recollida, os usuarios deberán leva-los recipientes ós sitios máis próximos a onde cheguen os citados vehículos, que lles serán sinalados polos servicios municipais.

4. Os usuarios do servicio deberán retira-los recipientes baldeiros da vía pública no prazo de media hora des que se recolleu o lixo, se é de día; e se é de noite, antes das 8:00 h do día seguinte.

Artigo 21.- Lixos extraordinarios

Se algún usuario ten que dispor, de forma extraordinaria, dunha cantidade de lixo superior á que constitúe a produción normal e cotiá do seu domicilio ou establecemento, non poderá utiliza-lo servicio municipal ordinario e deberá poñelo en coñecemento do concello co fin de que este indique a solución máis adecuada, tendo en conta a natureza dos residuos.

CAPÍTULO IV

Lixos especiais

Artigo 22.- Definición de lixos industriais

Terán a consideración de lixos industriais especiais os que polas súas características non sexan inertes ou semellantes ós lixos urbanos e, en xeral, os que supoñan un risco potencial para a saúde pública e o medio ambiente.

Artigo 23.- Obrigas dos produtores e posuidores de lixos industriais

1. Os produtores ou posuidores de lixos industriais especiais están obrigados a adoptaren as medidas precisas para asegurar que o transporte, tratamento, eliminación e, se é o caso, aproveitamento deles se faga sen risco para as persoas e o medio ambiente.

2. Estes lixos deberán ser depositados en vertedoiros de seguridade ou eliminados na forma que legalmente corresponda segundo a súa natureza.

Artigo 24.– Xestión de lixos industriais

A xestión dos lixos de orixe industrial que teñan a consideración legal de tóxicos ou perigosos deberase facer a través dunha empresa debidamente autorizada e de conformidade coas disposicións da normativa sectorial correspondente.

Artigo 25.– Cascallos e entullos extraordinarios

1. Prohíbese pór nos recipientes normalizados destinados a lixos domiciliarios os cascillos ou entullos procedentes de calquera clase de obras, actividades ou industrias.

2. Tampouco se poderán pór nas vías e espazos públicos os entullos de calquera clase de obras de construción, reforma, amaño ou derrubamento de edificios ou movementos de terras.

Artigo 26.– Recollida de mobles e electrodomésticos

1. Non se poden pór nas vías e espazos públicos ningunha clase de mobles, electrodomésticos ou obxectos semellantes.

2. As persoas que desexen que llelos recollan deberán solicitarllo ó servizo municipal correspondente, que lles sinalará o día e hora para a súa retirada.

Artigo 27.– Recollida de animais mortos

Está prohibido o abandono de animais mortos en calquera clase de terreos ou vías públicas.

Artigo 28.– Automóbiles abandonados

1. Está prohibido abandonar nas vías ou espazos públicos calquera clase de automóbiles, ou restos deles.

2. Enténdense como abandonados os automóbiles –ou as partes deles– situados en vías ou espazos públicos que non son aptos para circular e que presentan signos

evidentes de deterioración, carecen de placas de identificación ou permanecen durante longos períodos de tempo en idéntica situación.

3. Os servicios municipais retirarán os automóviles, en uso das facultades que lles confire ó Concello a lexislación vixente e en concreto o art 292 do Código de Circulación, a Orde do 14 de febreiro de 1974, sobre retirada e depósito de vehículos automóviles abandonados, art 615 do Código Civil, R.D.L. 399/90, do 2 de marzo e lexislación concordante.

CAPÍTULO V

Dereito sancionador

Artigo 29.- Acción pública

Calquera persoa poderá denunciar ante o concello as infraccións contra o presente regulamento e as disposicións específicas sobre a materia.

Artigo 30.- Responsabilidade: Ós efectos deste Regulamento, serán considerados responsables das infraccións previstas no mesmo:

- a) As persoas que directamente executen a actividade infractora ou as que a ordenen, canto o executor directo estea obrigado a cumprila devandita orde.
- b) As persoas físicas ou xurídicas que sexan titulares ou promotoras da acción ou omisión infractora.
- c) Se concorresen varias persoas físicas ou xurídicas na autoría da infracción, ou cando o deterioro ambiental fose froito duna acumulación de infraccións e non fose posible discerni-lo grao de participación efectiva de cada unha delas, a responsabilidade solidaria.
- d) Os produtores de residuos que os entreguen para a súa eliminación a un terceiro non autorizado, serán responsables solidarios con este de calquera prexuízo que se derivase, así como das sancións que correspondese impoñer.
- e) Dos danos producidos froito da mala fe na entrega dos residuos ou da desinformación sobre as características dos produtos entregados, será responsable que efectuase a entrega.

Artigo 31.- Definición e clases de infraccións administrativas Constitúen infraccións administrativas os actos ou omisións que contraveñen as disposicións contidas neste regulamento. As infraccións clasifícanse en moi graves, graves e leves.

Artigo 32.- Procedemento sancionador

1.- Tramitación: A incoación, ordenación, instrucción e resolución dos expedientes administrativos sancionadores en materia de disciplina medioambiental contemplada por este Regulamento, observará o capítulo 2 do Título 9 da Lei 30/92, do 26 de novembro de Réxime Xurídico das Administracións Públicas e do Procedemento Administrativo Común e o Real Decreto 1398/93 do 4 de agosto, polo que se aprobou o Regulamento de Procedemento para o exercicio da potestade sancionadora.

Considéranse infraccións as tipificadas como tales neste Regulamento ou disposicións concordantes das que trae causa.

Só se poderá iniciar un expediente administrativo disciplinario, se os feitos se atopan debidamente tipificados ou constitutivos de infracción na normativa citada.

2.- Inspeccións: As autoridades municipais ou persoal funcionario ou laboral municipal debidamente identificado e requirido, poderán realizar inspección entrando en instalacións, locais ou recintos, cantas veces sexa necesario, atopándose os propietarios, titulares-responsables ou usuarios das mesmas obrigados a permiti-lo seu acceso, sempre que a actividade inspectora teña por obxecto garanti-lo cumprimento das prescricións deste Regulamento.

3.- Medidas cautelares e reparadoras: Cando existise risco grave ou inminente para a materia protexida por este Regulamento, o órgano municipal competente para a incoación do expediente, poderá ordenar motivadamente a suspensión inmediata da actividade, sen prexuízo de que simultaneamente, previa ou posteriormente se inicie o expediente disciplinario. A adopción destas medidas cautelares esixirá audiencia do interesado por prazo de tres días, agás situación que esixan unha resposta ou actuación inmediata.

As medidas cautelares para evitar ou paraliza-la acción productora do dano medioambiental poderán ter unha duración non superior a seis meses. Poderanse adoptar as medidas cautelares que sexan necesarias para tal protección dentro dos límites de sa razón e con respecto exquisito ós dereitos fundamentais e liberdades públicas, e sen prexuízo de solicita-las oportunas autorizacións xudiciais, ou dar conta a estas instancias, de ser necesario.

Se se impuxesen medidas reparadoras, determinarase o prazo das mesmas, coa posibilidade de simultanearse coas medidas cautelares. Sen prexuízo da sanción que en cada caso proceda, o infractor deberá repara-lo dano causado, aspecto sobre o que determinará o órgano municipal competente para impoñe-la sanción, sen prexuízo de que o Concello impoña multas coercitivas nos termos do art 42.2 da Lei 1/95 do 2 de

xaneiro, de Protección Ambiental de Galicia, para o caso de que o infractor non reparase o dano.

Artigo 33.- Infraccións moi graves

Constitúen infraccións moi graves:

- 1) a reincidencia na comisión de tres faltas graves no período de dous anos;
- 2) a realización de actividades de recollida, transporte, aproveitamento ou depósito de lixos sen autorización ou licencia;
- 3) a obstrución ou impedimento ó labor inspector do concello;
- 4) o vertido de lixos e refugallos en lugares non autorizados.

Artigo 34.- Infraccións graves

Constitúen infraccións graves:

- 1) a reincidencia na comisión de tres faltas leves no período de dous anos;
- 2) a realización de actos de manipulación ou deterioración do equipamento de recollida de lixo; a realización de actos de propaganda mediante lanzamento de carteis ou folletos en vías e espazos públicos;
- 4) o incumprimento das normas sobre depósito e retirada de cascallos nas vías públicas;
- 5) a colocación de carteis e a realización de inscricións e pintadas en lugares non permitidos;
- 6) o abandono de mobles, animais mortos ou automóbiles nas vías ou nos espazos públicos.

Artigo 35.- Infraccións leves

Constitúe infracción leve calquera outro incumprimento das disposicións deste regulamento que non estea cualificado como moi grave ou grave.

Artigo 36.- Sancións

1. As infraccións leves poderán ser sancionadas con apercibimento e multa de ata 15.000 pta.; as graves, con multa de 15.001 a 50.000 pta.; e as moi graves, con multa de 50.001 a 100.000 ptas.

Todo isto sen prexuízo de esixirlles ós responsables da infracción, se fose o caso, que realicen os traballos de eliminación dos lixos e que indemnicen os danos causados.

2. No caso de reincidencia na infracción do deber contido no artigo 8 deste regulamento, tamén se poderá impo-la sanción de retirada temporal da licencia ou autorización municipal para o funcionamento do establecemento de que se trate, ata un máximo dun ano, co correspondente precinto do establecemento sen dereito a indemnización, nin devolución de taxas ou outros dereitos económicos.

Disposición final

Este regulamento que consta de trinta e seis artigos e unha disposición final, entrará en vigor unha vez aprobado definitivamente polo Concello da Estrada, e publicado o seu texto completo no Boletín Oficial da Provincia e transcorra o prazo de quince días a que se refiren os artigos 70.2 e 65.2 da Lei 7/1985, do 2 de abril, reguladora das bases de réxime local.



A Estrada, 8 de maio de 2000

O ALCALDE